

# ԵՂԻՇԵ ՉԱՐԵՆՑ

## 1897-1937



### ՄԱՀՎԱՆ ՏԵՍԻԼ

«Մահվան տեսիլ» բանաստեղծությունը Չարենցը գրել է 1920 թ. Երևանում, երբ երկիրը դեռևս ցնցումների մեջ էր: Չարենցի ճակատագիրը միշտ էլ անխզելիորեն կապված է եղել իր հայրենիքի ճակատագրին. իր Նաիրի երկրի ու ժողովրդի վիճակը նրա հոգում դրամատիկ ապրումներ էին արթնացնում: Լինելով հայրենիքի ցավի ու ողբերգության ականատեսն ու մշտարթուն տարեգիրը՝ բանաստեղծը մտահոգ էր նրա բախտի համար ու սրտի դողով էր հետևում նրա փոթորկուն օրերի ալեկոծումներին.

*Որպես լքված թավջութակի ձգված մի լար՝  
Դողում է սիրտս կարոտով մի ահարկու...*

Բանաստեղծը փորձում էր մշուշապատ իրականության մեջ շոշափել նաիրյան «պայծառ գալիքը»: Եվ «տխուր այս օրերում», երբ իր հոգու լուսավոր առավոտները ինչ-որ մեկի դաժան երազանքով դարձել էին «մի անկրակ իրիկնաժամ», նա ինքնամեղադրական անողոք մի դատաւճռով փորձում է իր մեջ փնտրել պատճառը.

*Գուցե այդ ե՛ս եմ, որ սրտով իմ լուսնահար  
Ոչ մի կրակ հեռուներից ձեզ չբերի,  
Ու ցանկացա, որ չօրհներգե ո՛չ մի քնար  
Լուսապսակ, պայծառ գալիքը Նայիրի...*

Եվ բանաստեղծի նաիրյան «երազի վերջին» սիրուց ծնվում է ինքնագոհաբերման անբեկանելի որոշումը, որի մեջ ուրվագծվում է իր երկրի լուսավոր ապագայի ու պայծառ օրերի մտապատկերը.

*Թող ո՛չ մի զոհ չպահանջվի ինձնից բացի,  
Ուրիշ ուրքեր կախադանին թող մոտ չգան.  
Եվ թող տեսնեն ի՛մ աչքերի մեջ կախվածի,  
Իմ բո՛րբ երկիր, լուսապսակ քո ապագան:*

Բանաստեղծությունը հայրենասիրության ու անձնագոհության բառակերտ հուշարձան է՝ Չարենցի անմնացորդ ինքնայրումը խորհրդանշող:

### ԱՌԱՋԱԴՐԱՆՔՆԵՐ

1. Կարդա՛ «Մահվան տեսիլ» բանաստեղծությունը:
2. Համացանցից գտի՛ր և ունկնդրի՛ր բանաստեղծությունը Ազատ Գասպարյանի կատարմամբ: **Հղումը՝** [https://www.youtube.com/watch?v=c3C-8\\_synzl&t=37s](https://www.youtube.com/watch?v=c3C-8_synzl&t=37s)
3. Ընթերցանությունից և ունկնդրումից հետո ներկայացրո՛ւ զգացողություններդ՝ լրացնելով աղյուսակը:

Ի՞նչ եմ տեսնում	Ի՞նչ եմ լսում	Ի՞նչ եմ զգում

4. Ներկայացրո՛ւ պատմական ժամանակաշրջանի նկարագիրը, նրա ազդեցությունը Չարենցի հոգեվիճակի և բանաստեղծության վրա:
5. Առանձնացրո՛ւ այն տողերը, որոնք ընդգծում են բանաստեղծի հոգեվիճակը:
6. Դո՛ւրս գրի՛ր համատեքստային բառերը, ցո՛ւյց տուր, թե ինչ են արտահայտում, ի՞նչ զգացողություններ են կապված նրանց հետ:

Համատեքստային բառեր	Նրանց կետ կապված զգացողություններ

7. Ունկնդրի՛ր համանուն երգը: Երաժշտությունը՝ Արմեն Արևշատյանի: Ըստ քեզ՝ երգը որքանո՞վ է փոխանցում բանաստեղծության հույզերն ու տրամադրությունները: Հիմնավորի՛ր կարծիքդ:
8. Ներկայացրո՛ւ բանաստեղծության մեջ առկա տաղաչափական օրինաչափությունները:
9. Ցույց տուր լեզվական օրինաչափություններն ու նրանց դերը շարժուն և անշարժ պատկերներ ստեղծելու հարցում, օրինակ՝ բացատրի՛ր, թե իմաստային ինչ երանգ է հաղորդում բանաստեղծությանը հարակատար դերբայի կիրառությունը:

10. Մեկնաբանիր, թե ինչ լուծում է տալիս բանաստեղծը բարդ իրավիճակում, երբ հայրենիքի փրկությունը զոհեր է պահանջում:
11. Ըստ քեզ՝ քնարական հերոսի ինքնագոհաբերության մղումը արդյոք հավատ ներշնչող է: Հիմնավորիր կարծիքդ:
12. Մեկնաբանիր բանաստեղծության գաղափարը: Ի՞նչ է փոխանցում մեզ հայրենասեր գրողը:
13. Ներկայացրո՛ւ Չարենցի բերած տաղաչափական նորությունները:
14. Քո ուսումնասիրած ստեղծագործություններից դ՛րս գրիր բանաստեղծի կիրառած մոտավոր հանգերի օրինակներ:

<b>Ստեղծագործությունը</b>	<b>Մոտավոր հանգի օրինակները</b>
«Մահվան տեսիլ»	
«Պատմության քառուղիներով»	
«Դանթեական առասպել»	
«Վահագն»	

15. Համեմատիր «Պատմության քառուղիներով» պոեմը և «Մահվան տեսիլ» բանաստեղծությունը: Մեկնաբանիր, թե որ ստեղծագործությունն է տոգորված հայրենիքի ապագայի նկատմամբ հավատով և ինչու: Առանձնացրո՛ւ կարծիքդ հիմնավորող տողերը: